

Jesus wil verstaan word

Matteus 4:18-5:2

Inleiding

- Soms voel God so onvindbaar en onverstaanbaar.
- Dan sê ons:
 - dit voel asof ek teen die plafon vas bid.
 - Dit voel asof Hy nie daar is nie.
 - Ek lees en bid maar niks gebeur nie.
 - Ek bid en lees nie meer nie – dit help nie.
 - Hy sien my nie raak nie,
- Dit voel eintlik soms regtig asof Hy ons gesukkel in die lewe nie raaksien nie,
 - en ook met alles wat Hy sê eintlik nie verstaan wil word nie.
 - Asof alles so ingewikkeld is...
- Maar hoe lyk God se hart hieroor regtig?

Agtergrond

- Jesus het hier pas begin met sy werk.
 - Hy was pas gedoop en daarna voorberei deur die versoeking in die woestyn.
 - Hy het 'n profesie vervul deur in Kapernaum te gaan woon en die kern van sy boodskap met die Jode begin deel:

- “Bekeer julle, want die koninkryk van die hemel het naby gekom.”
 - Min mense het Hom al geken.
- Maar sonder ‘n WhatsApp group of ‘n oproep
 - het hierdie boodskap van Jesus omtrent die hele Joodse gemeenskap laat regop sit
 - want hulle het geweet dat ‘n nuwe koninkryk sal kom
 - en dat die spesiale een van God, die Messias, ook die koning gaan wees.
- Jesus het toe solank vir Hom vier mense gekry vir praktiese indiensopleiding.
 - Hy het wyd rondgepreek in sinagoges en ook deur wonderwerke Homself bewys as die spesiale een van God.
 - Nuus oor Hom het soos ‘n veldbrand versprei
 - Mense van naby en vêr het rondom Jesus begin saamkoek.
- Daar was groot belangstelling, nuuskierigheid en afwagting.
 - Hulle het gehoor hulle moet hulle bekeer vir die Koninkryk,
 - maar wie sal uiteindelik reg genoeg kon wees vir die Koninkryk van die hemel?
 - Hulle het die wette geken wat deur hulle leiers ingedril is.

- Hulle het 'n bepaalde idee gehad van wat dit vat om 'n goedgekeurde Jood te wees...
- maar wie sou inkom en wie sou buite hierdie nuwe moes Koninkryk bly?

Die oomblik

- En toe gebeur die oomblik lees ons in 5:1
 - Jesus sien hierdie massas mense raak wat op sy woorde en optrede begin reageer het.
 - Nou,... dis nie asof Hy nié van hulle geweet het
 - en nou skielik kom Hy om 'n hoek en daar staan hulle nie!
 - Nee, Hy sien net skielik dieper as die lywe wat daar staan...
 - Hy sien skielik tot in hulle harte.
- ...'n Klomp mense met groot afwagting maar onseker en verward oor Hom.
 - Onseker oor hierdie koninkryk waarvan Hy praat en of hulle dit sal maak of nie...
 - En wanneer Hy hulle só raaksien doen Hy iets wat op sigself vir ons die Christelike boodskap van die laaste 2000 jaar ook verduidelik...:
- *“Toe Jesus die menigte mense sien, het Hy teen die berg opgegaan. Nadat Hy gaan sit het, het sy dissipels na Hom toe gekom, ²en Hy het hulle geleer en gesê...”*

- Wat!?! Hoe in die lewe verduidelik hierdie sin die Christelike boodskap van die laaste 2000 jaar!
 - Dit is een van daardie versies wat mens sommer oor spring om by die 'juicy' dele te kom.
 - Die meeste mense stel belang in wat Jesus gaan sê maar dink nie hierdie inleiding is belangrik nie.
 - Maar hierdie vers is een van die kragtigste in hierdie hele gedeelte.
 - Dit som eintlik die hele gedeelte op!
 - ...hoekom sal julle vra is hierdie vers so belangrik?...
- *Dis 'n prentjie van God wat*
 - *my en jou verdwaaldheid raaksien,*
 - *stelling inneem om lewegewende woorde te deel*
 - *en verstaan wil word.*
- Matteus sê baie aspris dat hierdie horde mense wat so saamdrom, Jesus opval.
 - Hy sien die dinge wat in hulle harte en gemoed aan die gang is.
 - Dis dan wanneer Hy 'n klein entjie teen die berg uitgaan en gaan sit om juis daaroor te praat.
 - Dit was die gebruik van Rabbi's om te sit terwyl hulle hulle volgelingen leer.
- Wanneer Jesus dan so paar tree eenkant gee en gaan sit

- Dan weet die vier manne wat hy nou pertinent geroep het
 - dit is nou tyd... hulle moet naderstaan... hier kom dit nou...
 - Hy gaan hulle nou leer oor hierdie massa mense.
- Die verwarde en onsekere klomp.
 - Wat moet hulle harte hoor?
 - Wat is die antwoord wat hulle nodig het vir die vrae in hulle gemoed?
 - Wie gaan kan deel wees van die koninkryk van die hemel?
 - Jesus sien hierdie vrae... en wil hulle baie graag die antwoorde gee.

Om verstaan te word

- Sien net eers dit raak oor Jesus
- Hy wil verduidelik.
 - Hy wil vertel.
 - Hy wil verkeerde idees regstel.
 - Hy wil geken word.
 - Hy wil so graag woorde en wysheid deel
 - wat werklik die koninkryk van God vir ons sal verduidelik
 - en wat dit is om daarin te lewe.
 - En die seer keer van om nie daarin te lewe nie
 - Jesus, ...wil verstaan word!!

- Maar so baie mense voel asof God die teenoorgestelde doen.
 - Asof Hy nie gekry wil word nie.
 - Asof Hy nie die deur oopmaak as ons klop nie
 - en nie sy foon antwoord as ons bel nie.
 - Asof Hy nie gepla wil word of wil toelaat dat ons Hom leer ken nie.

In 'n onderhoud is Richard Dawkins, bekende Ateïs, gevra wat hy sou doen indien hy na sy dood wel voor God te staan sou kom. Richard Dawkins het Bertrand Russel, 'n ateïs uit die 1950's aangehaal en gesê dat hy sou vra: "Sir, why did you go through so much pains to hide yourself?"

- Maar hierdie twee verse wil ons anders laat dink oor God.
 - Hierdie eenvoudige twee verse –
 - die opmerk van die skare se gemoed,
 - die eenkant gaan sit en begin gesels
 - - spreek boekdele van God se hart... vir jou en my.
- Hy sien ons soeke en verdwaaldheid...
 - Hy verstaan jou vrae en onsekerheid...
 - Hy weet waar jy reg verstaan en waar jy verkeerd verstaan.
 - Hy wil ons ook reghelp met sy antwoorde
- Maar die krag van wat ons uit hierdie 1 inleidende sin haal
 - tref jou dubbel tussen die oë as jy sien hoe Matteus hierdie hart van Jesus 4 hoofstukke later by 'n

heeltemaal ander geleentheid beskryf in Matteus 9:35-38.

³⁵Jesus het al die dorpe en klein plekkies besoek. Hy het die mense in hulle sinagoges geleer, die evangelie van die koninkryk verkondig en elke soort siekte en kwaal gesond gemaak.

³⁶Toe Hy die menigtes sien, het Hy hulle innig jammer gekry, want hulle was moeg en hulpeloos soos skape wat nie 'n wagter het nie. ³⁷Hy sê toe vir sy dissipels: "Die oes is groot, maar die arbeiders min. ³⁸Bid dan die Here aan wie die oes behoort, om arbeiders uit te stuur vir sy oes."

- Wow! Dit is regtig Jesus se hart!
- Die woord wat hier vertaal word met 'innig jammer gekry' beteken letterlik: "geroerde binnekant".
 - God se binnekant roer wanneer Hy jou raaksien.
 - Hy sien jou moegheid en frustrasie,
 - jou gevoel van hulpeloosheid diep in jouself
 - wat jy dalk nie sommer teenoor ander mense sal erken nie.
- En by hierdie spesifieke gedeelte in Matt 9 lees ons
 - hoe Jesus sy dissipels opdrag gee om iets aan die verdwaaldheid van ander mense se harte te gaan doen.
 - Hy sien nie net raak nie,

- Hy wil ook hê iets moet daaromtrent gedoen word.
- God wil so graag dat ons nie moeg, gefrustreerd, verdwaal en hulpeloos voel nie.
 - Hy wil dat ons sy koningskap
 - verstaan
 - en ontdek wat dit is om daarin en daaruit te lewe.
- Dit is hoekom God self Homself verneder het en in die eerste plek aarde toe gekom het.
 - Dit is hoekom Jesus dood is en opgestaan het
 - Dit is hoekom Jesus hier sy volgelinge opdrag gee om iets daaraan te doen.
 - Om vir mense te vertel dat die Koning wat mense se harte verstaan gekom het
 - Dat God verstaanbaar is in Jesus
 - Sy liefde en genade vir mense soos ons
 - wat soms verdwaald voel en nie verstaan nie.
- Ek dink die vraag wat God eerder met verwondering gevra moet word, is:
 - “Sir, why did you go through so much pains to show yourself”
- Dit is presies die rede vir Nagmaal...

- 'n wys geleentheid waar God sy werk in Jesus vir ons wys
- En kan dit sien en verstaan.
 - Hy wat Homself offer,
 - die dood se mag oor ons breek
 - sodat ons nie in onsekerheid en verdwaaldheid oor onself hoef te lewe nie.
- Ons kan lewe met Hom in ons,
 - nou in sy koninkryk
 - met sy sorg en genade en Hom as ons koning.
- Daarvoor is ons 'n verlose familie diensknegte wat gestuur is...

Slot

- Eintlik is God baie duideliker as wat ons soms onthou in die midde van ons probleme
- Mag ons na Jesus luister en by Hom ons antwoorde vind
 - in die evangelie wat ons vandag weer vier
- En mag ons as gestuurdes ook bid en deelneem aan die oes van ander wat nog wag.

Amen

Griffel van Wyk
Trinitas
22 November 2015